

চাঁদপুরে ব্যবসায়ী উজ্জ্বল হত্যাকাণ্ড
আসামিরা প্রকাশ্যে ঘুরে বেড়ায় খুঁজে পায় না পুলিশ
নিজস্ব প্রতিবেদক ১৯ জুন ২০২২, ০০:০০

চাঁদপুরের মতলব উত্তর উপজেলার ষাটনল পর্যটন কেন্দ্রে মোবাইল ব্যবসায়ী উজ্জ্বল মিয়াজীকে কুপিয়ে ও গুলি করে হত্যার এক মাস পেরিয়ে গেলেও অভিযুক্ত কাউকে গ্রেফতার করতে পারেনি পুলিশ। ভুক্তভোগী পরিবারের অভিযোগ, উজ্জ্বল হত্যা মামলার আসামিরা প্রকাশ্যে ঘুরে বেড়াচ্ছে, অনেকে প্রকাশ্যে মিছিল-মিটিংয়ে যোগ দিচ্ছে। কিন্তু হত্যাকাণ্ডের এক মাসেও কাউকে খুঁজে পায়নি পুলিশ। অভিযুক্তদের গ্রেফতার ও বিচারের দাবিতে নিহতের স্বজনরা জাতীয় প্রেস ক্লাবের জহর হোসেন চৌধুরী হলরুমে সংবাদ সম্মেলনসহ বিভিন্ন স্থানে মানববন্ধন কর্মসূচি পালন করলেও কোনো সুফল মেলেনি। মামলার তদন্তসংশ্লিষ্টদের আসামি ধরতে এক প্রকার অনীহায় নিহতের পরিবারের সদস্যদের মধ্যে হতাশা বিরাজ করছে। পাশাপাশি আসামিরা গ্রেফতার না হওয়ায় নিরাপত্তাহীনতায় ভুগছেন ভুক্তভোগী পরিবারটি।